

زمن تمثيل



الله يجازيك يا زمن تمثيل.

والله ضحككتني غصبن عني .

الطيب فيك ليه بخته قليل

بقي يعني عشان وشي مكركب

تحسبني خلاص أن انا زعلان

أنا ها أزعل ليه

مين قال يا زمان أن انا زعلان

أنا شكلي معقد يمكن حبه

مرسوم على وشي صحرا ورمل

وعنيا بتصرخ م الوحدة

والصوت متحاش

من كتر حديثي أنا ونفسي
أنا يمكن أكون هادي وسلمي ...
مش باعرف أجامل ولا انافق
ولا باعرف أرسم ضحكه تخيل
أنا صلد وعندي الحس بخيل ..
مش باعرف اهمبك ولا امثل ...
و الوش بطبعه كمان كسل
ولايعرف يضحك ع الفاضي .
هاكذب لو قلت إن انا راضي .
علي صورة وشي ف وقت الضيق .
أو وقت ما بالمح دور تمثيل

أنت اتغيرت كثير يا زمان
ما بقيتش بتضحك زي زمان .
لونك بقى أصفر أوي فاتح .
واهو غطى جميع الدنيا صفار.
وانا عقلي احتار م اللي باشوفه
بقى كل الناس شاطرين تمثيل ...
المخرج مابقاش عنده جديد
هيعدل إيه على ضحكة بعرض الوش
تمام
أنا بس المشكله عندي ف شيء
مش باتعلم
٣٦ سنة باجري ف ورق الضحكه داھي

مش عارف أوصل للجودة

مع إنني قبلت ظروف سودة

ترسم ملايين

وكتير م الضحك الزايف والأصفر

ياتري الأيام ممكن

تصبغني كمان أصفر!!!؟

والقاني الصبح

أول مااصحي

باضحك ع الفاضي وف الفاضي ...

من باب أولى

أنني باجامل مش باتأخر

على نفسي ف شيء

ولاراح يفضل

فوق الوش صحاري ورمل

مش عايزك تزعل مني ياريت

أصل انا فلاح

وف قلب الريف انا عشت العمر

على أنه يكون لنا حصن وبيت ،

إسمه الوحدة ف كل الاوقات

نطلع بالفرح من الأحزان

ونداوي جراحنا بضحكايه

ونلم زعلنا من الأيام ،...

نحرقه مع بعض ف سهرايه

ورغيف العيش ويا الدقه ...

بيجمع م الأحباب ملايين
ليه فجأة ياسيدي أنت اتغيرت
وبدول الغرب أنت اتأثرت
مين قال لك تعمل زيبهم
مشيتني غريب بين أحبابي
وحداني بادور على ضحكة
ويا أما أكون كداب زفه
ويا أما أكون مرسوم فوق وشي
صحاري ورمل ...
وشكلي كنيب
الله يجزيك يا زمان تمثيل
الصادق فيك يسقط ف الدور